

PELAJARI SILAT MEMBAWA...

# Peserta Australia belajar hormati nilai tradisional

B. Harian (M)

-2 DEC 1987

SELALUNYA silat dipelajari untuk membela diri, tetapi bagi pasukan Australia, pencak silat digunakan untuk kawalan diri dan belajar menghormati nilai-nilai tradisional yang kian luput.

Pengurus pasukan, Jan De Jong, berkata di Australia nilai-nilai kemanusiaan dan kepercayaan semakin pupus. Hanya melalui kegiatan tradisional seperti silat, perkara-perkara ini dapat dipulihkan.

"Melalui silat, nilai-nilai tradisi seperti kawalan diri, sikap sabar dan hormatkan orang tua dapat diteruskan.

"Orang-orang di Australia kini semakin melupakan adat dan budaya. Hinggakan kepercayaan kepada agama juga semakin luntur," kata De Jong.

De Jong yang pandai berbahasa Indonesia, mula mengamalkan pencak silat ini sejak tahun 1940-an, setelah belajar daripada Bapak Suhadi dari Perguruan Sucihati.

"Saya mula mengajar di Australia tahun 1952, dengan pengikut 12 orang dan kini perguruan saya dikenali dengan nama Setiahati," ujarnya.

Kini seramai 300 pesilat Australia bergabung

dengan seni mempertahankan Ju Jitsu dan menubuhkan sekolah seni mempertahankan diri.

"Tetapi, kami tidak meniru cara-cara mempertahankan diri ala Ju Jitsu. Silat mempunyai kelebihan kerana ciri-ciri silat itu sendiri adalah unik," katanya.

Australia akan menurunkan lima pendekar silat.

Menurut James Byrnes, 22, dia meminati silat sejak lima tahun lalu. Cara mempertahankan diri yang halus dan tertib, membuatkan dia tidak mahu bertukar haluan.

"Silat mempunyai cara penampilan yang berbeza daripada seni mempertahankan diri yang lain. Dalam seni ini saya belajar cara-cara mengawal diri," kata Byrnes.

Sementara Paul Taylor, 22, dan Scott Minchin, 18, meminati silat sejak beberapa tahun lalu menyatakan, silat masih berpegang teguh kepada nilai-nilai tradisi.

Menurut mereka, ciri-ciri ini penting bukan sahaja mempertahankan diri malahan bagi menjaga nilai-nilai moral agar tidak hancur mengikut keadaan zaman.